



**Sidaamu Dagoomu Qoqqowi Mootimma Xaphoomu  
Seeru Allaalsha**

**Sidaamu Dagoomu Qoqqowi Mootimma Xaphoomunna Aliidi Seeru  
Allaalshi Taqqira Seeru Allaalaano Yannate Geeshsha Gaamate Biddissa  
kiiro 1/2012**

**Fooqa, 2012 M.D**

**Hawaasa**

## **Biddissu kiir 1/2012**

### **Sidaamu Dagoomu Qoqqowi Mootimma Xaphoomunna Aliidi Seeru Allaalshi Taqqira Seeru Allaalaano Yannate Geeshsha Gaamate Biddissa**

Sidaamu dagoomu qoqqowi mootimma xaphoomu seeru allaalshi uurrinsha tantanatunkunni harancho yanna ikkasinni uurrinshate giddo heedhanno loosu tantano xiinxallo assatenni mannu wolqa wonshate ledote yanna hasiranoha ikkasinni;

Wole widoonni xaphoomu seeru allaalshi uurrinsha dagate uytanno owaante suffanno gede assa gadado ikkitinohuranna loosu giddora eate hasiissanno mannu wolqa addintanni albiidi zooneranna albiidi qoqqowira loosanni keeshitino seeru allaalaano yannate geeshsha gaamatenni horonsira dandiinanita ammanatenni;

Seeru allaalshi uurrinsha qoqqowu deerinni sasu taqqinni yaano xaphoomu, aliidinna umi dirimi yaamamatenni tantanantanota ikkitanna haarotenni tantanamino sidaamu dagoomu qoqqowira woradunna woradu deerri quchummara loosanni keeshshitino umi dirimi seeru allaalshi tantano yannate geeshsha noo gedeenni suffanota ikkitinohura xaa yannara xaphoomunna aliidi seeru allalshi tantano haaro ikkite uurritinota ikkasenni mannu wolqa gaamatenni wonsha hasiissanota hedote giddo woratenni;

Seeru allaalshi uurrinsha giddo loossanonna mootimma loosasine lallawinni galtano mannu wolqa qoqqowu jeefisiisaanote amaale mininni fultino wodho kiir 2/2012 garinni gaamantanoha ikkana addi seerinni galtanno mannu wolqa yaano seeru allaalanno gaamate hajo xaphoomu seeru allaalshi fushshanno biddissinni gaamantannota xawissanno wodho kiir 2/2012 quwa 4(3) garinni kuni biddissi fulino.

#### **1. Harancho Su'ma**

Konne biddissa “**Sidaamu Dagoomu Qoqqowi Mootimma Xaphoomunna Aliidi Seeru Allaalshi Taqqira Seeru Allaalaano Yannate Geeshsha Gaamate Biddissa Kiir 1/2012**” yine woshshinara dandiinanni.

## 2. Tiro

Qaalu horo wole tiro uytannota ikka hoogguro konni biddissi giddo:

1. **“Qoqqowo”** Yaa Sidaami Dagoomi Qoqqowooti.
2. **“Lallawa”** yaa Sidaamu dagoomu qoqqowi moottimma Xaphoomu seeru allaalshi biilloonyenna loosu qeecha murate fulino kiir 6/2012 lallawaati.
3. **“Albiidi Qoqqowo”** yaa Wodiidi Daga, Dagoominna Manni Qoqqowooti.
4. **“Albiidi Zoone”** yaa sidaamu dagoomu qoqqowi moottimma kalaqantara albaanni sidaamu daga gashshootu mereersha ikkita wodiidi daga, dagoominna manni qoqqowinni kalaqante keeshshitinonna Ella 27/2012 M.D nni hanaffe assootunni (by conduct) diigantino mootimma gashshootu taqqaati.
5. **“Seeru Allaalaancho”** yaa alibiidi zooneranna albiidi qoqqowira seeru ogimmanni loonsanni loosira albiidi qoqqowinni fultino seeru allaalaano gashshooti wodho kiir 170/2011 garinni somame loosanni keeshshino seeru ogeessaati.
6. **“Gaamooshshe”** yaa mitte mootimma uurrinshara loosanno loosaa sincho loosu deerranna damooza amadino garinni woy loosaa sinchu sumummenni woffi yiino loosu deerrinninna damoozinni albaanni loosanni keeshshino woy wole mootimma uurrinshara gaamame loosanno gade assate.

## 3. Koo-teemmate Xawishsha

Konni biddissi giddo mitte koo-teemmanni xawinsoonni hed wole koo-teemmano hanqaffanno.

## 4. Jeefishshu Mami-geeshsha

1. Kuni biddissi albiidi zooneranna albiidi qoqqowira seeru allaalaano ikkita loossanni keeshshitinonna haaru sidaamu dagoomu qoqqowu moottimma loosu afoo dandiitanno seeru allaalaano qoqqowu xaphoomunna aliidi seeru allaalshi taqqira yannate geeshsha gaamate amanyoote jeefisate loosu aana hosannoha ikkanno.
2. Qoqqowu xaphoomunna aliidi seeru allaalshira seeru allaalaano gobbanni noo mannu wolqa jeefisiisaanote amaale mininni fultino wodho kiir 2/2012 garinni gaamantanoha ikkanno.

## 5. Gaamooshshe Jeefisa Lainohunni

1. Albiidi zooneranna albiidi qoqqowira aliidinna xaphoomu seeru allaalshi taqqira loossanni keeshshitinonna qoqqowu loosu afoo dandiitanno seeru allaalaano amaddino loosu deerrinna damoozinni qoqqowu xaphoomunna aliidi seeru allaalshi taqqira gaamantannoha ikkanno.
2. Kunni quwi cinaanchu quwi 1 garinni albiidi qoqqowira loosanni keeshshino seeru alaalaancho heewo nookiha qoqqowu xaphoomu seeru allaalshira dhaadotenni gaamanniha ikkanno.
3. Kunni quwi cinaanchu quwi 1 garinni albiidi zoonera loosanni keeshshino seeru allaalaanchi qoqqowu xaphoomu seeru allaalshira gaamamate hasidhanno seeru allaalaano ledro rosu deerrinni, akatoometenni, loosu rosichininna xaphoomu seeru allaalshi massagaano hedonni(recommendation) heewisiinseenna roorino guma abbatenni gaamammannoha ikkanno.
4. Kunni quwi cinaanchu quwi 3 iima xawinsonni heewisiisate bikkaanchi konnu woroonni noo shae giddo xawinsonni garinni keennanniho.

| A . K | Bikkaanchu                                                     | Bikkanchu amadanno xaphooma bixxille xibbuunni | Bikkanchu bixxille tittirshunni                                                                                                                                                                                                                        |                                                                                                                                                                     | Addi xawishshi                                                                              |
|-------|----------------------------------------------------------------|------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------|---------------------------------------------------------------------------------------------|
| 1     | Rosu deerri (egennantinon na fajjo afidhino rosu uurrinshanni) | 30                                             | Seeru rosinni LL.B noohura 25 bixille                                                                                                                                                                                                                  | Seeru rosinni LL.M noohura 30 bixille                                                                                                                               | 1999 M.D gedenanni roso e''e gudinohu fulote fonqolo (exit exam) adhe saino taje abba noosi |
| 2     | Akatoome (hojji fayle coimma)                                  | 20                                             | <ul style="list-style-type: none"> <li>Borrote dispiliinete qaafu adhinoonnihunna rikerdete yanna gudinokkihi 15 bixxille</li> <li>Borrote dispiliinete qaafonni luphi yitino qaafu adhinoonnihunna rikerdete yanna gudinokkihi 10 bixxille</li> </ul> | Hojji faylesi giddo dispiliinete qaafu nookihi woy rikerdete yanna gudinohura 20 bixxille                                                                           |                                                                                             |
| 3     | Loosu rosichi                                                  | 20                                             | <ul style="list-style-type: none"> <li>LL.B digireenna 6 – 10 diri seeru loosi rosichi noohura 15 bixille woy</li> <li>LL.M digireenna 4 – 8 diri seeru loosi rosichi noohura 15 bixxille woy</li> </ul>                                               | <ul style="list-style-type: none"> <li>LL.B digireenna 11 diri aliidi seeru loosi rosichi noohura 20 bixxille woy</li> <li>LL.M digireenna 9 diri aliidi</li> </ul> |                                                                                             |

|   |                                                                   |    |                                                                                                                    |                                                                                                                                                                     |                                                                                                                               |
|---|-------------------------------------------------------------------|----|--------------------------------------------------------------------------------------------------------------------|---------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------|
|   |                                                                   |    | <ul style="list-style-type: none"> <li>PhD digireenna 2 – 6 diri seeru loosi rosichi noohura 15 bixille</li> </ul> | seeru loosi rosichi noohura 20 bixille woy<br><ul style="list-style-type: none"> <li>PhD digireenna 7 diri aliidi seeru loosi rosichi noohura 20 bixille</li> </ul> |                                                                                                                               |
| 4 | Xaphoomu seeru allaalshi massagaano uytanno hedo (recommendation) | 30 |                                                                                                                    |                                                                                                                                                                     | <b>‘Massagaano’</b> yaa gaamooshshu woy koffeeenyu komite miila ikkitinoki xaphoomu seeru allaalshi manejiementete miillaati. |

- Kunni quwi cinaanchu quwi 2 – 4 geeshsha xawinsoonna garinni xaphoomu seeru allaalshira yannate geeshsha dhaadotenninno ikko heewotenni gaamamate ajanni ajeenna seeru rosinni LL.B digireenna 6 diri loosu rosichi woy LL.M digireenna 4 diri loosu rosichi woy PhD digireenna 2 diri loosu rosichi heera noosi.
- Kunni quwi cinaanchu quwi 3 nna 4 garinni gaamamikkinni gatanno albiidi zoonera loosanni keeshshino seeru allaalaanchi qoqqowu aliidi seeru allaalshi taqqira dhaadotenni gaamammannoha ikkanno.
- Kunni quwi cinaanchu quwi 2 – 6 geeshsha worroonna garinni assinanni gaamoshshinni wo’mitukkinni gattannonna kaimu loosira hasiissanno seeru allaalaanchi madabe qoqqowu giddo afamanno quchumu woy woradu seeru allaalshi taqqinni soorrotenni woy argetenni wonshinanniha ikkanno.
- Kunni quwi cinaanchu quwi 7 iima worroonnihi noo gedeenni heerennanni albiidi qoqqowi addi addi qoqqowu mereershi uurrinshubbara woy wolu deerri uurrinshubbara seeru ogimmani loossanno ogeeyye qoqqowu xaphoomu seeru allaalshi manejiementete uytanno gumulo garinni qoqqowu xaphoomu woy aliidi seeru allaalishi taqqira soorrotenni yannate geeshsha gaamara dandiinanni.

## 6. Gaamooshshu Komite Uurrisa

- Qoqqowu xaphoomunna aliidi seeru allaalshi taqqira seeru allaalaano gaamate loosu jeefisate yannate geeshshi gaamooshshu komite kunni biddissinni uurritino.

2. Gaamooshshu komite xaphoomu seeru allaalaanchinni filante somantanno shoole miilla heedhanose.

## **7. Gaamooshshu Komite Loosu Qeecha**

1. Qoqqowu xaphoomunna aliidi seeru allaalshi taqqira kaimaho hasiissannonna fajjinoonni seeru allaalaanchimma madawe badde xawissanno taje buuxa.
2. Konni biddissi quwa 5 garinni gaamantanno seeru allaalaano hasiissanno taje buuxatenni badate looso loosa.
3. Konni biddissi quwa 5(2) garinni albiidi qoqqowi xaphoomu seeru allaalshinni soorrotenni qoqqowu xaphoomu seeru allaalshira gaamamate hasattonsa borrotenni xawissanno gede assanna hasiise leelliro albiidi qoqqowi xaphoomu seeru allaalshi ledi taje soorrira.
4. Konni biddissi quwa 5(3 nna 4) garinni xaphoomunna aliidi seeru allaalshira gaamamate heewora hasiissannonna halaalaancho taje taashshi'rate hasatto noonsa seeru allaalaanora taje taashshidhanno gede ontu barri kaayyo uytara dandiitanno.
5. Gamooshshu komite miila ikkinonna konni biddissi quwa 5(3 nna 4) garinni yannate geeshsha gaamamate heewisamanno miili isi hajo lainohunni assinanni hasaawira dibeeqqanno.
6. Komitete hasaawi batinye miilla leellituro hanafamannoha ikke hasaawe gumulate amanyoote lainohunni roore huuronni irkisantino hedo gumulantannota ikkitanno.
7. Kunni quwi cinaanchu quwi 6 garinni komitete miillanni batinyu irikisino hedonni baxxitino gumulote hedo noosi miili baxxitino hedosi badooshshunni songaalete iima boorreessantannosiha ikkanno.
8. Kunni quwi cinaanchu quwi 6 garinni hajo gumulate komitete miilla mereero taalo huuro heedhanno woyte gambasaanchu irkisino hedo jeefishsha afidhannota ikkitanno.

## **8. Koffeenya Tirranni Gara**

1. Kunni biddissi garinni assinanni gaamooshshu gumulo kaiminni kalaqamanno koffeenya buuxate looso loossanno yannate geeshshi komite kunni biddissinni uurritino.
2. Koffeenya buuxate komite xaphoomu seeru allaalaanchinni filante somantanno sase miilla heedhannose.

3. Gaamooshshu gumulo iima koffeeenyu noosihu gaamooshshu komite gumulo xawissu barrinni hanafe ontu barri giddo koffeeenyasi borrotenni koffeeenyu komitera shiqishira dandaanno.
4. Koffeeenyu komite gambooshshunna gumulote heddo shiqishate amanyoote lainohunni konni biddissi quwa 7 (5-8) iima gaamooshshu komitera xawinsonnihu horote iima hosanno.
5. Konni quwi cinaanchu quwi 3 iima xawinsonni garinni shiqanno koffeeenyira ku'laatu shiqinku 10 barra sa'anokki yanna giddo gumulo uynanniha ikkanno.
6. Koffeeenyu komitenni buuxante shiqqino gumulote heddo xaphoomu seeru allaalaanchinni kaajjitara woy woyyaabbe kaajjitara woy soorrante gumulantara dandiitanno.
7. Kunni quwi cinaanchu quwi 6 garinni uynanni gumulo gaamooshshu hajo lainohunni goofimarchunnita ikkitanno.

#### **9. Gumulamaanchimma Heedhannosikki Seeranna Assoote**

Kunni biddissi ledoo kippi yaanno seeri woy assooti kunni biddisinni hanqafantino hajubba lainohunni gumulamaanchimma dinosi.

#### **10. Biddissu Kaajjanno Yanna**

Kuni biddissi Fooqa 02/2012 M.D hanafe kaajjinoho.

**Hawaasa, Fooqa 02, 2012 M.D**

**Mato Maaru**

**Sidaamu Dagoomu Qoqqowi Mootimma Xaphoomu Seeru Allaalaancho**